



**NOGOMETNI / FUDBALSKI SAVEZ
BOSNE I HERCEGOVINE**

**PROPOZICIJE
takmičenja WWIN lige BiH i završnice Kupa BiH
sa minimumom medicinskih zahtjeva
takmičarska sezona 2026/27**

Juni/Lipanj 2026. godine

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 26.06.2026. godine d o n o s i

PROPOZICIJE
takmičenja WWIN lige BiH
takmičarska sezona 2026/27

OPŠTE ODREDBE

Član 1.

Ovim Propozicijama utvrđuje se način organizovanja i provođenja takmičenja WWIN lige BiH u takmičarskoj sezoni 2026/27.

UČESNICI TAKMIČENJA

Član 2.

U skladu sa Odlukom Generalne skupštine NS/FS BiH broj: 02 - 1326 - 6.1 /24 od dana 27.05.2024. godine i ostvarenih rezultata klubova WWIN lige BiH u takmičarskoj sezoni 2025/26, kao i klubova koji su ispunili uslove za dobijanje licence iz Pravilnika o licenciranju klubova Nogometnog/Fudbalskog saveza Bosne i Hercegovine, učesnici takmičenja WWIN lige BiH u takmičarskoj sezoni 2026/27 su: najboljih osam plasiranih ekipa iz takmičarske sezone 2025/26, te po jedan učesnik iz NS Federacije BiH i FS Republike Srpske.

Popuna WWIN lige BiH za takmičarsku sezonu 2026/27 vrši se prvakom iz NS Federacije BiH i prvakom iz FS Republike Srpske koja ispunjavaju kriterije u postupku licenciranja za takmičenje u WWIN ligi BiH. Ukoliko prvoplasirana ekipa iz NS Federacije BiH ili FS Republike Srpske odustane od učešća u takmičenju WWIN lige BiH, popuna se vrši tako što naredna najbolje plasirana ekipa iz Prve lige Federacije BiH i Prve lige Republike Srpske, koja ujedno ispunjava sve propisane uslove, postaje učesnik WWIN lige BiH za takmičarsku sezonu 2026/27.

Na kraju takmičarske sezone 2026/27 iz WWIN lige BiH ispadaju dva (2) najslabije plasirana kluba.

ORGANIZACIJA TAKMIČENJA

Član 3.

Takmičenjem u WWIN ligi BiH rukovodi Komitet za takmičenje NS/FS BiH (u daljem tekstu Komitet), u saradnji sa Sektorom za takmičenje, suđenje i događaje NS/FS BiH.

Član 4.

Takmičenje u WWIN ligi BiH se odvija po **ČETVEROKRUŽNOM** bod sistemu (9+9+9+9=36).

Početak takmičenja u WWIN ligi BiH za takmičarsku sezonu 2025/26, prema kalendaru koji usvaja IO NS/FS BiH planiran je za 08.08.2026. godine (1. kolo), a završetak 30.05.2027. godine (36. kolo).

U slučaju prekida prvenstva zbog razloga više sile te nedostatka termina za završetak takmičenja Izvršni Odbor NS/FS BiH može donijeti odluku o drugačijem načinu odigravanja prvenstva.

Član 5.

Raspored odigravanja prvenstvenih utakmica određuje se prije početka takmičarske sezone žrijebom, uz mogućnost primjene poludirigovanog načina žrijebanja samo za klubove iz istog mjesta gdje igraju svoje prvenstvene utakmice kao domaćini, s tim da ako su zainteresovani, klubovi mogu podnijeti pismeni zahtjev Komitetu da im se omogući razdvajanje odigravanja prvenstvenih utakmica

kao domaćina u odnosu na klub iz istog mjesta, i to najkasnije pet dana od određenog datuma provođenja žrijeba za raspored takmičenja za takmičarsku godinu.

Klub koji ne bude imao predstavnika na žrijebanju parova će snositi disciplinsku odgovornost.

Konačnu odluku o svim zahtjevima kao i modalitetu žrijebanja takmičarskih parova donosi Komitet, s tim da se mora voditi računa da se ne narušava interes i pravo ostalih klubova učesnika takmičenja. Odluka Komiteta je konačna.

Komiteta može odobriti da žrijebanje takmičarskih parova za prvo kolo takmičenja, umjesto predstavnika klubova vrši neka istaknuta nogometna/fudbalska osoba.

Nakon žrijebanja takmičarskih parova za raspored prvog prvenstvenog kola takmičenja preostali dio rasporeda takmičenja utvrđuje se na osnovu primjene Bergerovih tablica.

Komiteta može i nakon žrijebanja, a zbog opravdanog razloga, odobriti zamjenu domaćinstva uz obostranu saglasnost klubova. Opravdanost zahtjeva cijeni Komitet.

Takmičenje se igra u jesenjem i proljetnom dijelu takmičarske sezone, a u skladu sa utvrđenim Kalendarom takmičenja Nogometnog/Fudbalskog saveza BiH, za takmičarsku sezonu 2026/27.

Odluku o izmjenama, od strane Izvršnog odbora NS/FS BiH usvojenog Kalendara takmičenja, u slučaju vanrednih okolnosti (vanrednog stanja, stanja elementarne nepogode, promjena u kalendaru međunarodnih takmičenja/natjecanja ili drugih odluka FIFA-e i UEFA-e), donosi Komitet na prijedlog Sektora za takmičenje, suđenje i događaje NS/FS BiH.

Tri posljednja kola takmičenja igraju se istog dana i u isto vrijeme. Izuzetno, ukoliko određena utakmica nema rezultatski značaj, te ishod iste ne utiče bitno na poredak na tabeli, Komitet može odobriti odigravanje iste u drugom terminu.

UTVRĐIVANJE PLASMANA

Član 6.

Klub koji pobijedi na utakmici osvaja tri boda, a kod neriješenog rezultata svaki klub osvaja po jedan bod.

Ako klubovi osvoje isti broj bodova odlučuje razlika između postignutih i primljenih pogodaka. U slučaju istog broja primljenih i postignutih pogodaka (razlika pogodaka), bolje mjesto na tabeli zauzima ekipa koja je postigla više pogodaka, a ako su postigli isti broj pogodaka dijele mjesta koja im pripadaju.

Izuzetno, ako je se radi o mjestu koje odlučuje o prvaku, mjestu koje obezbjeđuje učešće u međunarodnim takmičenjima ili o prelasku u niži rang takmičenja, u slučaju jednakog broja bodova nakon 36. kola, plasman se utvrđuje na osnovu dodatne tabele od rezultata koje su u međusobnim utakmicama tokom prvenstva postigli klubovi sa istim brojem bodova.

Plasman na dodatnoj tabeli utvrđuje se zbirom osvojenih bodova.

Ako je zbir bodova jednak, odlučuje razlika između datih i primljenih pogodaka.

Ako je i ova razlika jednaka, odlučuje veći broj postignutih pogodaka u gostima (kada su u kombinaciji dva kluba), odnosno veći broj postignutih golova (kada su u kombinaciji tri ili više klubova).

Ako se poredak klubova ne može utvrditi niti nakon primjene dodatne tabele, primjenit će se kriterij bolje ukupne razlike između postignutih i primljenih golova iz svih utakmica koje su klubovi odigrali tokom prvenstva.

Ukoliko se ni na taj način ne može utvrditi plasman, onda se odigravaju utakmice između zainteresovanih klubova i to:

- jedna utakmica po Kup sistemu na neutralnom terenu ako su u kombinaciji dva kluba,
- tri utakmice po jednostrukom bod sistemu, na neutralnom terenu, ako su u kombinaciji tri kluba,
- potreban broj utakmica po jednostrukom bod sistemu, na neutralnom terenu, ako je u kombinaciji 4 ili više klubova.

Ukoliko se usaglase klubovi, umjesto odigravanja ovih utakmica, pitanje pobjednika može se utvrditi žrijebom koji će provesti Komitet za takmičenje NS/FS BiH.

Završnu tabelu proglašava Komitet za takmičenje NS/FS BiH i utvrđuje predstavnike za UEFA takmičenja.

Član 7.

Utakmice se igraju u trajanju 2x45 minuta.

Odmor između dva dijela igre traje minimalno 10 (deset), a maksimalno 15 (petnaest) minuta.

Član 8.

Nakon obavljenog žrijeba za raspored takmičenja prvog dijela takmičenja za prvenstvo WWIN lige BiH, klubovi učesnici takmičenja su obavezni u roku od 5 (pet) dana dostaviti u pismenoj formi Službi za takmičenje i suđenje NS/FS BiH slijedeće informacije:

- adresar kluba prema obrascu koji će klubovima dostaviti Odjel za takmičenje NS/FS BiH.
- vrijeme odigravanja utakmica (subota - nedjelja) dnevni - noćni termin, (s tim da NFS BiH zadržava pravo promjene termina u skladu sa zahtjevima nosioca TV prava i medijskog sponzora, te se u tom slučaju kao zvaničan termin utakmice računa onaj koji je unesen u Comet sistem NS/FS BiH od strane Službe za takmičenje i suđenje NS/FS BiH).

PROMJENA TERMINA ODIGRAVANJA UTAKMICA

Član 9.

Promjena termina odigravanja utakmice može se vršiti isključivo na osnovu podnesenog pismenog zahtjeva zainteresovanog kluba Komitetu, najkasnije 8 (osam) dana prije rasporedom utvrđenog termina odigravanja utakmice, a koji u sebi sadrži razlog zbog kojeg se traži promjena termina s priloženom dokumentacijom, iz koje se nesumnjivo može utvrditi opravdanost podnesenog zahtjeva.

Pored navedenih razloga klub može dati i eventualni prijedlog novog termina, koji treba, ukoliko je moguće, biti usaglašen sa protivničkim klubom.

U slučaju kada zahtjev za promjenu termina (iz razloga više sile) nije podnesen shodno stavu 1. ovog člana, podnosilac zahtjeva obavezan je dostaviti uz obrazloženje i pismenu saglasnost drugog kluba (protivnika) utakmice, za koju se traži promjena termina.

Odluku o zahtjevu kluba za promjenu termina utakmice iz stava 1. i 2. ovog člana donosi Komitet.

Komitet će na zahtjev kluba odobriti odlaganje utakmice ukoliko su u pitanju odredbe člana 17. i 18. Pravilnika o nogometnim/fudbalskim takmičenjima BiH.

Odluka Komiteta o podnesenom pismenom zahtjevu za promjene termina odigravanja utakmice je konačna i ona se dostavlja zainteresiranim klubovima i ostalim učesnicima takmičenja.

ODLAGANJE UTAKMICE ZBOG DANA ŽALOSTI I NA ZAHTJEV POLICIJE

Član 10.

Ako se odlukom nadležnog državnog organa (Vijeće/Savjet ministara BiH, entitetske vlade ili lokalni organi uprave) proglasi Dan žalosti na području gdje se prema rasporedu takmičenja tog dana igraju utakmice WWIN lige BiH, takmičarski organ koji rukovodi takmičenjem, može odrediti novi termin odigravanja utakmice, u skladu sa Kalendarom takmičenja, pri tome vodeći računa da se obezbijedi regularnost takmičenja.

U slučaju kada zbog Dana žalosti nije izvršeno odlaganje utakmice, obaveza je klubova da prije početka utakmice, na terenu za igru, odaju počast minutom šutnje ili na drugi prikladan način obilježe Dan žalosti.

U slučaju kada je Dan žalosti proglašen od strane Vijeća/Savjeta ministara BiH, klub domaćin je obavezan da na jarbolima stadiona zastave budu spuštene na pola koplja ili jarbola, a igrači na terenu za igru na rukavu dresa mogu nositi obilježje crne trake kao znak žalosti.

Klub domaćin obavezan je da putem razglasa zatražiti od svih učesnika utakmice da se suzdrže od bilo kakvih postupaka suprotno pijetetu zbog kojeg je proglašen dan žalosti.

Član 11.

Ako se u toku trajanja utakmice, na osnovu javnog saopštenja od strane nadležnog organa iz prethodnog člana, proglasi Dan žalosti, utakmica se neće trajno prekinuti, ali je sudija utakmice dužan da u prvom privremenom prekidu igre zaustavi igru i zatraži od igrača na terenu da minutom šutnje izraze saučešće prema nastradalim ili preminulim osobama.

Član 12.

Kada nadležni policijski organ područja, na kojem se trebaju odigrati rasporedom takmičenja predviđene prvenstvene utakmice, obavijesti Komitet pismenim putem, da bi odigravanje utakmice prema utvrđenim terminima moglo imati ozbiljnih posljedica po bezbjedonosnu situaciju učesnika utakmice, Komitet je obavezan uzeti u razmatranje pismeni zahtjev policijskog organa za odlaganje utakmice, te donijeti odluku u vezi sa odlaganjem utakmice, vodeći računa da se zadovolje kriteriji bezbjedonosnog - sigurnosnog aspekta i zaštite regularnosti takmičenja.

Odlaganje utakmice može trajati najduže do 10 (deset) dana u odnosu na rasporedom utvrđeni termin. Odluka Komiteta je konačna i obavezujuća za sve učesnike utakmice.

ODAVANJE POČASTI MINUTOM ŠUTNJE I IZNOŠENJE TRANSPARENATA HUMANITARNOG SADRŽAJA NA UTAKMICAMA

Član 13.

Odavanje počasti (pijeteta), prema određenim kategorijama lica, može se vršiti neposredno prije početka utakmice u objektu stadiona i to u slučajevima: iznenadne smrti (nesreće) igrača, sportskih radnika klubova i navijačkih skupina, članova organa i tijela Saveza, organa UEFA-e i FIFA-e, stradalih lica u elementarnim i drugim katastrofama, smrti državnih ili entitetskih istaknutih ličnosti, te ako je proglašen Dan žalosti.

Za svaku namjeru odavanja počasti minutom šutnje ili na drugi način, klubovi, organizacije i pojedinci moraju pismeno tražiti odobrenje od Komiteta najkasnije 48 (četrdesetosam) sati prije početka utakmice sa detaljnim obrazloženjem i protokolom aktivnosti. O odluci Komiteta podnosioci zahtjeva biće upoznati najkasnije 8 (osam) sati prije početka utakmice, kao i sva službena lica utakmice (delegat, sudije utakmice), te klubovi.

U slučaju iznenadne smrti ili nesreće lica iz stava 1. ovog člana, odluku će donijeti delegat utakmice nakon konsultacija sa Službom za takmičenje i suđenje NS/FS BiH i predsjednikom Komiteta.

Za slučajeve iznošenja (isticanja) transparenata čiji sadržaj ima humanitarni karakter: borba protiv rasizma, mržnje, nasilja na stadionima, nacionalizma, pomoći unesrećenim licima u elementarnim i drugim katastrofama, primjenjivat će se odredbe kao i za odavanje počasti.

U slučaju da klub na utakmici obavi poseban protokol, a za koji nije blagovremeno podnesen zahtjev i koji nije biti odobren od strane Komiteta isti će snositi disciplinske sankcije.

DUŽNOSTI KLUBOVA

Član 14.

Klub domaćin utakmice je obavezan pripremiti teren za igru, kao i sve ostale prostorije (svlačionice, kancelarije i sl.), da su čiste, zagrijane, opremljene sa svim tehničkim pomagalicama najkasnije 90 (devedeset) minuta prije određenog termina za početak utakmice.

Za odigravanje utakmica WWIN lige BiH klub domaćin obavezan je osigurati najmanje sedam (7) ispravnih službenih lopti robne marke Select koje u svemu moraju odgovarati propisima Pravila nogometne/fudbalske igre.

U slučaju da se utakmica igra na snijegom pokrivenom terenu, lopte ne mogu biti bijele boje već moraju biti crvene ili u nekoj drugoj vidno uočljivoj boji, a obaveza domaćina je da osigura iste.

Klub domaćin utakmice je obavezan obezbijediti osobu (operatera) koja će biti zadužena za unos događaja sa utakmice u COMET live platformu.

Utvrdjivanje podobnosti terena za igru vrši sudija utakmice u prisustvu oba kapitena ekipa koje nastupaju na utakmici.

Odluku o podobnosti terena za odigravanje utakmice donosi isključivo sudija utakmice u skladu sa Pravilima igre.

Član 15.

Klubovi su obavezni doći na stadion na kome će se odigrati utakmica najkasnije 90 (devedeset) minuta prije utvrđenog vremena za početak utakmice i nastupiti sa najboljim sastavom ekipa, te prisustvovati radnom sastanku (brifingu) kojim predsjedava delegat utakmice.

Član 16.

Takmičenje se administrativno vodi kroz Comet informacioni sistem. Klub domaćin obavezan je da delegatu utakmice stavi na raspolaganje računar sa priključkom na internet i printer. Klubovi su dužni da najkasnije 75 (sedamdesetpet) minuta prije početka utakmice dostave delegatu na propisanom obrascu spisak igrača i službenih lica koja će nastupati na utakmici. Sve osobe, igrači i službena lica sa dostavljenog propisanog obrasca za utakmicu moraju biti licencirani od strane NS/FS BiH i registrovani u Cometu.

Obrazac mora biti ovjeren i potpisan od zvaničnog predstavnika kluba. Klubovi koji nemaju 20 (dvadeset) igrača u zapisniku sa utakmice snosit će disciplinske sankcije. U slučaju da sistem Comet nije u funkciji, vođenje zapisnika sa utakmice se radi ručno, na za to propisanom obrascu, a naknadno će delegat u sistemu Comet napraviti zapisnik. Ručni zapisnik piše se u četiri primjerka i potpisuju ga delegat, sudija i predstavnici klubova.

Član 17.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti i entitetske, zastave županija/kantona, klupske, te zastava fair playa. Istaknute zastave trebaju biti istih dimenzija, uredne i čiste.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 58. Disciplinskog pravilnika NS/FS BiH.

Član 18.

Klub domaćin je obavezan da poduzme sve mjere i radnje u cilju zaštite: članova gostujuće ekipe, službenih lica utakmice, gostujućih navijača (kod organiziranog dolaska), neposredno prije početka utakmice, u toku i po završetku utakmice, a sve do napuštanja stadiona za odigravanje utakmice, prema preporuci organa bezbjednosti koji je dao odobrenje za odigravanje utakmice, kao i poduzeti sve mjere na stadionu za odigravanje utakmice i oko njega, predviđene ovim Propozicijama takmičenja, Pravilnikom o sigurnosti na međunarodnim utakmicama i utakmicama saveznog stepena takmičenja, kao i ostalim uputstvima NS/FS BiH.

Svaki klub domaćin kao organizator utakmice dužan je na zahtjev kluba-gosta obezbijediti najmanje 5% ukupnog kapaciteta stadiona isključivo za gostujuće navijače i to u odvojenoj i bezbjednoj zoni. Ukoliko odvojena zona zauzima i više od 5% ukupnog kapaciteta stadiona, gostujućem klubu, odnosno njegovim navijačima, mora se staviti na raspolaganje i ovaj veći broj mjesta.

Klub domaćin utakmice obavezan je obezbijediti odgovarajuću dežurnu redarsku službu s propisno označenim dovoljnim brojem redara zaštitarske organizacije (kojih ne može biti manje od 10), pripadnike policije, liječnika i dežurno sanitetsko vozilo sa vozačem, osobljem i nosilima, kao i najmanje 6 (šest) propisno označenih sakupljača lopti, ravnomjerno raspoređenih uz ogradu tribina stadiona, kao i zadužiti posebno lice za njihov rad.

Klub domaćin obavezan je podnijeti pismenu prijavu i tražiti odobrenje za održavanje javnog skupa utakmice nadležnoj policijskoj upravi Ministarstva unutrašnjih poslova, na čijoj teritoriji se treba odigrati utakmica, navodeći sve relevantne podatke, a posebno: mjesto i naziv stadiona, vrsta utakmice, imena klubova, datum i vrijeme odigravanja utakmice, kao i procenu mogućeg broja gledalaca, kako domaćih, tako i gostujućih, ako su najavljeni, te podatke o angažovanim ostalim službama, redarska, ljekarska, vatrogasna, sa orijentacionim brojem lica, te druga neophodna saznanja u vezi sa organizacijom utakmice.

Pismeni zahtjev za odobrenje odigravanja utakmice podnosi se najkasnije 72 (sedamdestdva) sata prije određenog termina za odigravanje utakmice ili u rokovima kojima je regulisano ovo pitanje nadležnih organa bezbjednosti u mjestu odigravanja utakmice.

Pismeno odobrenje za odigravanje utakmice klub domaćin obavezno dostavlja na uvid delegatu utakmice prije njenog početka, odnosno na brifingu.

Bez pismenog odobrenja nadležne policijske stanice i prisustva pripadnika policije, ljekara, sanitetskog vozila, sanitetskih nosila, redarske službe i vatrogasnog vozila utakmica se neće igrati.

Odluku o neodigravanju utakmice donosi delegat utakmice, uz konsultacije sa Službom za takmičenje i suđenje NS/FS BiH i saopštava je sudiji utakmice i zvaničnim predstavnicima klubova, prije početka utakmice i sve to evidentira u izvještaju delegata utakmice i zapisniku sa utakmice.

Klub domaćin za neispunjavanje ovih obaveza snosi takmičarske i disciplinske posljedice u skladu sa Pravilnikom o nogometnim/fudbalskim takmičenjima BiH i Disciplinskim pravilnikom NS/FS BiH.

Klubovi su odgovorni za ponašanje svojih igrača, službenih osoba, članova, navijača i svake druge osobe koja obavlja dužnost na utakmici u ime kluba.

Promocija, objava ili isticanje na bilo koji način, političkih poruka ili bilo koji drugi vid političkog djelovanja unutar ili u neposrednoj blizini stadiona nije dozvoljeno prije početka utakmice, tokom utakmice i po završetku utakmice.

Klubovi učesnici takmičenja dužni su ispoštovati odluku nadležnog organa NS/FS BiH da se iz sigurnosnih razloga zabranjuje organizovani odlazak navijača na gostujuće utakmice njihovih klubova.

Na terenu za igru za vrijeme odigravanja utakmice zabranjen je bilo koji oblik reklamiranja. Na mrežama, ugaonim zastavicama ili vratima ne može biti izvješen reklamni materijal ili niti bilo kakav pribor.

Također je zabranjena reprodukcija logotipa na travnatom dijelu terena za igru (*korištenjem lasera i sl.*).

Ukoliko se na stadionu za vrijeme odigravanja utakmice koristi sat koji pokazuje odigrano vrijeme utakmice, isti mora biti zaustavljen na kraju regularnog vremena igre svakog dijela igre, tj. nakon isteka 45. i 90. minuta igre.

Klub domaćin dužan je osigurati prostorije za provođenje doping kontrole.

Prostorije sačinjavaju:

- prostorija za čekanje, koja mora biti opremljena hladnjakom s dozvoljenim pićima i čašama za piće,
- prostorija s radnom površinom za popunjavanje obrazaca i rad s uzorkom.

Pristup prostorijama i lokacija prostora za provođenje doping kontrole trebaju biti jasno označene natpisom "DOPING KONTROLA."

Klub-organizator dužan je obezbijediti na stadionu jednu kontrolnu sobu, koja služi za hitno okupljanje krizne grupe na utakmici.

Ova kontrolna soba služi za hitno okupljanje: delegata, službene predstavnike klubova, voditelja osiguranja, koordinatora za bezbjednosti NS/FS BiH (ako je određen) i predstavnika policije u slučaju krizne situacije i po potrebi predstavnik hitne pomoći i vatrogasaca. Po mogućnosti, ova kontrolna soba treba biti okrenuta ka unutrašnjosti stadiona, kako bi krizna grupa imala vizuelnu preglednost.

Član 19.

Klub domaćin obavezan je neovisnoj snimateljskoj kompaniji, koju ovlasti NS/FS BiH, omogućiti adekvatne uvjete za snimanje utakmice s najmanje 3 (tri) kamere, jedna na sredini terena i dvije bočne u visini kaznenog prostora.

Također, TV kompaniji koja vrši direktni prijenos utakmice, osigurati punu sigurnost za opremu i djelatnike, za vrijeme i nakon završetka utakmice, u objektu na stadionu.

Tehničko osoblje zaduženo za pripremu, rad i kontrolu rada led panela klub domaćin je dužan prijaviti delegatu utakmice i obezbjediti im klupske akreditacije radi obavljanja dužnosti.

Klub je dužan označiti prostor za fotografе (iza vrata i sa suprotne strane od tehničkih prostora), koji promjenu položaja mogu vršiti samo u poluvremenu utakmice.

Klubovi su dužni da obezbijede obavezno prisustvo trenera na konferenciji za medije po završetku utakmice, u suprotnom podliježu disciplinskoj odgovornosti.

Također, trener je obavezan nakon utakmice dati izjavu nosiocu TV prava, na mjestu koje je određeno od strane nosioca TV prava. U suprotnom, klub snosi disciplinske sankcije.

Član 20.

Za vrijeme odigravanja prvenstvenih utakmica u stadionu, pored terena za igru, u tehničkom prostoru oba kluba moraju se nalaziti lica licencirana od strane NS/FS BiH i koja ispunjavaju kriterije u postupku licenciranja za takmičenje WWIN lige BiH, i to:

1. predstavnik kluba,
2. glavni trener (UEFA 'Pro') licenca
3. prvi pomoćni trener (UEFA 'A' licenca)
4. drugi pomoćni trener (UEFA 'A' licenca)
5. Trener golmana (UEFA 'A' Goalkeeper licenca)
6. igrači,
7. ljekar kluba,
8. fizioterapeut
9. komesar za bezbjednost (obaveza kluba domaćina).

Pored gore navedenih lica, svaki klub može dodatno prijaviti i do 5 (pet) ostalih službenih osoba koje mogu sjediti na klupi ekipe (pomoćni treneri, ljekar, fizioterapeut) koje moraju biti licencirane od strane NS/FS BiH. Ako klupa ekipe ima manje mjesta, preostali broj mjesta mora se smjestiti sa strane svake klupe ekipe.

U pogledu ponašanja i odijevanja na ova lica se primjenjuju isti propisi kao i za službena lica unutar tehničkog prostora.

U pogledu odijevanja lica u tehničkom prostoru obavezno se primjenjuju sljedeći standardi:

1. predstavnik kluba u odijelu (sa kravatom ili ne),
2. glavni trener u odijelu (sa kravatom ili ne), ili trenerci kluba,
3. dva pomoćna trenera u sportskoj opremi kluba,
4. igrači u sportskoj opremi sa markerima,
5. ljekar kluba, odijelo ili sportska oprema kluba,
6. fizioterapeut u sportskoj opremi kluba.
7. komesar za bezbjednost u odijelu (sa kravatom ili ne)

U slučaju nepoštovanja navedenih uslova klub snosi disciplinsku odgovornost.

Izuzetno, klub može biti bez prijavljenog glavnog trenera, i to najduže 15 (petnaest) dana u kontinuitetu, a bez disciplinskih posljedica.

Ukoliko je klub jednu osobu licencirao za obavljanje više dužnosti/ funkcija, ista može obavljati samo jednu od tih dužnosti na utakmici.

Sva službena lica klubova moraju imati validne licence evidentirane u Comet sistemu (treneri, predstavnik kluba, doktor, fizioterapeut i komesar bezbjednosti. Po završenom procesu licenciranja, službena lica klubova moraju biti registrovana u Cometu od strane Službe za takmičenje i suđenje NS/FS BiH, odnosno Centra za edukaciju kada su u pitanju treneri.

Ukoliko se radi o stranim državljanima, za gore navedene osobe klub je dužan dostaviti i dozvolu za rad u BiH, izdatu od nadležnih institucija u BiH.

Validnost evidentiranih licenci i identitet lica mogu kontrolisati samo subjekti koji su ih i izdali i delegat na utakmici. Identitet osoba iz zapisnika utvrđuje se na osnovu fotografije iz Cometa. Osobe sa spiska prijavljenih lica koje nisu registrovane u Cometu, za funkciju koju obavljaju na utakmici, i/ili im validna licenca nije unešena u Comet, ne mogu se nalaziti u tehničkom prostoru, osim zamjenskih igrača za koje važe odredbe člana 26. Propozicija takmičenja.

Član 21.

Za vrijeme odigravanja utakmica bez prisustva gledalaca, pored osoba iz člana 21. ovih Propozicija, mogu biti prisutni članovi uprava klubova, *(maksimalno 30 osoba po klubu uz dostavljeni spisak)*, akreditovani novinari i fotoreporter, osobe iz administracije kluba-domaćina.

Članovi uprava klubova i osobe iz administracije kluba-domaćina obavezni su boraviti u VIP loži.

NASTUPANJE NA UTAKMICI

Član 22.

Klubovi su dužni nastupiti na svim utakmicama stalnog takmičenja koje su odlukama takmičarskog organa zakazane, predviđene ili odlukom sudije privremeno prekinute, bez obzira na okolnosti u kojima su se nalazili u vrijeme kada su obavješteni da nastupe, odnosno da nastave igranje utakmice.

Klub koji odbije da nastupi ili neodigra utakmicu iz stava 1. ovog člana, odgovoran je za učinjeni propust u takmičarskom i disciplinskom smislu.

Organ koji rukovodi takmičenjem, u svim navedenim slučajevima iz ovog člana, takve utakmice registrovati će po službenoj dužnosti 3:0 (par forfe) u korist protivnika i podnijeti zahtjev disciplinskom organu za utvrđivanje disciplinske odgovornosti.

NAJMANJI BROJ IGRAČA U IGRI

Član 23.

Utakmica ne može da počne po Pravilima nogometne igre ako jedna od ekipa nema najmanje 7 (sedam) igrača na terenu za igru, od kojih je jedan vratar i kapiten.

Igrači, koji nisu upisani do početka utakmice u zapisnik sa utakmice, ne mogu nastupiti na utakmici.

Ako jedna ekipa za vrijeme igre ostane sa manje od 7 (sedam) igrača, sudija je dužan da zaustavi igru, a ako u roku od 5 (pet) minuta klub ne nastupi s minimalnim brojem igrača, sudija je dužan da označi kraj utakmice.

Član 24.

Svaka ekipa u zapisnik mora prijaviti minimalno 20 (dvadeset) igrača, a tokom igre se može izvršiti do 5 (pet) zamjena, tokom najviše 3 (tri) prekida igre (u suprotnom snosi disciplinske sankcije).

U zapisnik sa utakmice ekipa može prijaviti maksimalno 22 (dvadesetdva) igrača.

Član 25.

Ekipe na jednoj utakmici ne mogu igrati u istim ili sličnim bojama dresova. Ekipe su dužne usaglasiti boje opreme 72 (sedamdesetdva) sata prije zvaničnog termina odigravanja utakmice, u skladu sa prijavljenim osnovnim bojama.

U slučaju podudaranja boja opreme neposredno prije utakmice, dresove će promijeniti domaća (prvoimenovana, odnosno prvoimenovana ekipa - ako je domaćin utakmice NS/FS BiH ili neko drugi) ekipa. Ukoliko jedna od ekipa ne poštuje prijavljene boje dresova, ista snosi disciplinsku odgovornost.

PRAVO NASTUPA IGRAČA

Član 26.

Na prvenstvenim utakmicama mogu nastupiti igrači koji su stekli pravo igranja prema odredbama Pravilnika o registraciji, statusu i transferu igrača NS/FS BiH, ukoliko su navršili 17 (sedamnaest) godina života, kao i igrači koji su navršili 16 (šesnaest) godina života, ali sa obaveznim specijalističkim ljekarskim pregledom koji nadležni registracioni savez unosi u Comet sistem, na osnovu dokaza o obavljenom specijalističkom ljekarskom pregledu, dostavljenom od strane kluba, sa jasno naznačenim rokom trajanja istog, a kojim se oglašava sposobnim za nastupanje na utakmicama seniorskog uzrasta.

U zapisniku svaka ekipa mora imati najmanje 3 (tri) igrača mlađa od 21 (dvadesetjedne) godine starosti, a 1 (jedan) od igrača do 21 (dvadesetjedne) godine starosti mora biti u igri cijeli tok utakmice. U suprotnom klub snosi takmičarske i disciplinske posljedice. Ovi igrači moraju biti državljani BiH.

Ukoliko iz igre izlazi igrač mlađi od dvadeset jedne godine (21) starosti i ekipa ostaje bez najmanje jednog (1) igrača mlađeg od dvadeset jedne godine starosti u igru mora ući igrač koji ispunjava ovaj kriterijum kako bi navedeni uslov bio ispunjen. Ukoliko klub nema više igrača koji ispunjavaju ovaj kriterijum, nastavak utakmice igraju sa igračem manje.

Ukoliko ekipa u toku utakmice ostane bez igrača starosti do 21 godine života zbog disciplinske mjere isključenja, nastavlja utakmicu sa igračem manje.

Za takmičarsku sezonu 2026/27, igrači mlađi od 21. godine života smatraju se igrači rođeni 01.01.2005. godine i mlađi.

Pravo nastupa igrača stranih državljana regulisano je odredbama Pravilnika o registraciji, statusu i transferu igrača NS/FS BiH. Klub može imati više registrovanih igrača stranih državljana, s tim što 3 (tri) igrača strana državljanina mogu biti upisani u zapisnik sa utakmice i imaju pravo nastupa na jednoj utakmici. U suprotnom, klub snosi takmičarske i disciplinske posljedice.

Stranim državljanima u smislu prava nastupa ne smatraju se igrači koji imaju državljanstvo bilo koje od država koje su se nalazile u sastavu bivše SFRJ (Sjeverna Makedonija, Srbija, Crna Gora, Hrvatska i Slovenija), kao i igrači koji imaju državljanstvo neke od država članica Evropske unije, ali za iste ostaju obaveze u skladu odredbama člana 18. Pravilnika o registracijama klubova i igrača i statusu i transferu igrača NS/FS BiH.

Igraču kojem istekne boravišna dozvola nema pravo nastupa, a ako nastupi takav igrač, klub snosi takmičarske i disciplinske posljedice.

Igrači sa dvojnim državljanstvom ne smatraju se stranim državljanima.

Igrač koji je upisan u zapisnik utakmice, smatra se da na utakmici nije nastupio ukoliko nije ušao u igru.

Najviše četiri ustupljena igrača mogu nastupati na jednoj utakmici.

Igrač koji nije unesen u Comet sistem ne može nastupiti za svoju ekipu na utakmici.

Ukoliko oba kluba naprave prekršaj iz gore navedenih stavova, a za koji se snose takmičarske posljedice, takva utakmica će biti registrovana kao odigrana, ali se neće uzeti u obzir ostvareni rezultat na istoj.

IDENTITET IGRAČA

Član 27.

Na prvenstvenim utakmicama mogu nastupiti samo igrači čiji je identitet utvrđen putem fotografije iz Comet sistema, a u slučaju da Comet nije u funkciji, identitet će se utvrditi na osnovu javne isprave: lične karte ili pasoša, odnosno štampane ID Comet kartice. Igraču sa neadekvatnom

pohranjenom fotografijom u Cometu (kada je nemoguće utvrditi identitet), delegat utakmice neće dozvoliti nastup na utakmici.

Identitet se u pravilu utvrđuje prije početka utakmice.

Za igrače koji su zakasnili na početak utakmice, odnosno na početak drugog dijela, a upisani su u zapisnik sa utakmice, identitet se utvrđuje za vrijeme odmora između 2 (dva) dijela igre i neposredno po završetku utakmice.

LJEKARSKI PREGLED I ČLANARINA

Član 28.

Svaki igrač koji nastupa u takmičenju mora u Cometu imati unesen period važenja ljekarskog pregleda i period za koji je uplaćena članarina. Obavljeni ljekarski pregled mora sadržavati obavezujuće elemente koje je propisao Komitet za sportsku medicinu NS/FS BiH.

Rok valjanosti ljekarskog pregleda za igrače koji na dan izvršenog pregleda ima najmanje 17 (sedamnaest) i više godina života traje 6 (šest) mjeseci, a za mlađe igrače 4 (četiri) mjeseca.

Igraču koji nema unesen važeći ljekarski pregled u Comet, delegat utakmice neće dozvoliti nastup na utakmici.

DELEGAT NA UTAKMICI

Član 29.

Delegata na utakmici određuje Komitet sa usvojene liste delegata za takmičarsku sezonu 2026/27.

Ukoliko na utakmicu ne dođe delegirani delegat, njegovu dužnost preuzima posmatrač suđenja na toj utakmici.

Delegat zastupa Komitet i ima vrhovni nadzor na utakmici.

Komitet donosi posebno Upustvo o vršenju dužnosti delegata.

Delegat i sudija su obavezni dostaviti dopunski izvještaj u roku od 24 (dvadesetčetiri) sata po odigravanju utakmice, ukoliko je na utakmici došlo do incidenata, prekida utakmice, kao i na zahtjev Komiteta.

Član 30.

Delegat je obavezan da 90 (devedeset) minuta prije početka utakmice održi radni sastanak (brifing) sa predstavnicima klubova, četvrtim sudijom, koordinatorom bezbjednosti NS/FS BiH (ako je određen) komesarom za bezbjednost kluba domaćina i predstavnikom policije.

Kašnjenje na radni sastanak - brifing povlači disciplinsku odgovornost lica i klubova.

KOORDINATOR ZA BEZBJEDNOST

Član 31.

Na utakmicama na kojima je, prema članu 56. Pravinika o bezbjednosti NS/FS BiH, potrebno prisustvo koordinatora za bezbjednost NS/FS BiH, istog određuje Komitet za stadione i bezbjednost NS/FS BiH, sa usvojene liste koordinatora za bezbjednost NS/FS BiH za takmičarsku sezonu 2026/27.

Uloga i obaveze koordinatora za bezbjednost NS/FS BiH definisane su Uputstvom koje donosi Komitet za stadione i bezbjednost NS/FS BiH.

POSMATRAČ SUĐENJA

Član 32.

Posmatrače suđenja određuje Komitet za sudije i suđenje NS/FS BiH, sa liste posmatrača suđenja Premijer lige BiH za takmičarsku sezonu 2026/27.

Uloga i obaveze posmatrača suđenja su definisane Uputstvom koje donosi Komitet za sudije i suđenje NS/FS BiH.

SUDIJE/SUCI

Član 33.

Utakmice WWIN lige BiH mogu voditi samo sudije sa liste sudija WWIN lige BiH, čije određivanje vrši Komitet za sudije i suđenje NS/FS BiH, u skladu sa odlukom Izvršnog odbora NS/FS BiH.

Izuzetno, sudije sa liste neposredno nižeg stepena takmičenja (Prva liga NS F BiH i Prva liga FS RS) koji se nalaze u talent i mentor programu, mogu suditi utakmice WWIN lige BiH.

Član 34.

Sudija utakmice je dužan da prije početka utakmice pregleda i odluči da li je teren pogodan za igru.

Ako sudija utvrdi u prisustvu dva kapitena ekipa da je teren nepodoban za igru, utakmica se neće igrati, a sudija će sačiniti poseban izvještaj o nepodobnosti terena za igru.

Sudija je dužan da nakon utakmice u svom izvještaju navede podatke koje se odnose na postignute pogotke, zamijenjene, opomenute i isključene igrače, a prema potrebi i druge podatke, ako se radi o prekidu utakmice, neredu, tuči, uključujući eventualne prijave i sl.

Član 35.

Na prvenstvenim utakmicama WWIN lige BiH upotrebljavaće se VAR (Video assistant referee) tehnologija, u skladu sa odobrenjem, protokolom i odlukama Odbora Međunarodnog nogometnog /fudbalskog borda (IFAB), FIFA-e, UEFA-e.

Na utakmicama na kojima se koristi VAR (Video assistant referee) tehnologija, klub domaćin dužan je osigurati parking mjesto i obezbjeđenje za VAR reportažna kola, zatim odgovarajuće priključke električne energije i interneta, te prostor na vidljivoj i označenoj lokaciji pokraj terena za igru, minimalnih dimenzija 2x2 m, a na kojoj će isključivo sudije vršiti provjeru snimaka.

Lokacija parking mjesta za VAR reportažna kola, kao i lokacija prostora pokraj terena za igru, a na kojoj će sudije vršiti provjeru snimaka, za svaki od stadiona na kojima će klubovi WWIN lige BiH svoje utakmice igrati kao domaćini, zahtijeva prethodno odobrenje Službe za takmičenje i suđenje.

Sve navedeno u ovom članu mora biti u skladu s odlukama te smjernicama Međunarodnog nogometnog/fudbalskog borda (IFAB), FIFA-e, UEFA-e i Izvršnog odbora NS/FS BiH.

Član 36.

U slučaju da u vrijeme početka utakmice ili tokom odigravanja utakmice dođe do otkazivanja VAR (Video assistant referee) tehnologije iz bilo kojih razloga (nestanak električne energije, prekid internetskog signala, tehnički problemi i sl.), utakmica će početi, odnosno neće se prekidati, što znači da prekid u funkcionisanju VAR (Video assistant referee) tehnologije neće biti od uticaja na početak i tok utakmice u skladu sa VAR protokolom.

MEDIJSKE AKTIVNOSTI

Član 37.

Klubovi su obavezni za vrijeme odigravanja utakmica stalnog takmičenja obezbijediti u objektu stadiona prostoriju (salu) za održavanje press konferencija, kao i osobu zaduženu za medije (portparola) koja će biti odgovorna za koordinaciju medijskih aktivnosti kluba, a naročito u dijelu pružanja pomoći NS/FS BiH u prikupljanju informacija i statističkih podataka neophodnih za klub, neposredne saradnje sa službenim licima i predstavnicima glavih emitera - vlasnika TV prava, kada to oni zahtijevaju, te aktivnog učešća u organizaciji medijskih aktivnosti svojih klubova, u skladu sa ovim propozicijama i drugim važećim aktima NS/FS BiH.

Klubovi su obavezni, za vrijeme odigravanja utakmica obezbijediti u objektu stadiona, za potrebe medija i TV sponzora, rezervisan prostor sa internet konekcijom i namještaj koji obuhvata mjesta za komentatore, kao i mjesta za pozicije TV kamera za prenos utakmica vlasnika TV prava.

Klubovi mogu organizovati - održati na zahtjev TV sponzora ili prema ličnoj odluci press konferencije za akreditovane predstavnike medija, prije i nakon završetka utakmice u prostorijama sale za press konferencije ili na drugom prikladnom mjestu na stadionu preko portparola.

Ako se organizuju prije utakmice, pres konferencije se mogu organizovati najmanje na 1 (jedan) dan u odnosu na utvrđeni termin početka utakmice i vode ih portparoli klubova, a otvorene su za sve akreditovane medije.

Kada se organizuje press konferencija za medije nakon završetka utakmice, to mora biti učinjeno 15-20 minuta nakon završetka utakmice, a na istoj mogu biti prisutni: glavni treneri (zasebno), i najmanje po dva igrača za davanje izjava na prikladnom mjestu uz prethodnu saglasnost klubova.

Učesnici konferencije za medije (treneri, igrači, zvaničnici klubova) obavezni su se pridržavati kodeksa oblačenja i ponašanja za vrijeme nastupa na press konferenciji.

Također, klub domaćin je dužan da nakon utakmice pripremi i osigura tzv. mixed zonu, a oba kluba imaju obavezu da usmjere igrače da pri izlasku iz svlačionica prođu kroz ovaj prostor. Pristup ovom prostoru, pored igrača i službenih lica klubova, imaju isključivo akreditovani predstavnici medija.

Klubovi su obavezni obezbijediti da glavni trener i ključni igrač budu na raspolaganju za kratki intervju sa glavnim emiterom (vlasnikom TV prava), ako to oni traže. Realizacija se može izvršiti prije, u pauzi ili po završetku utakmice ili službenog treninga, na prikladnom mjestu koji utvrdi portparol kluba i vlasnik TV prava.

Klubovi su obavezni otvoriti svoje treninge na dan prije određenog termina za utakmicu za predstavnike medija u trajanju od najmanje 15 (petnaest) minuta pred početak treninga. Nakon isteka ovog vremena portparol kluba će preduzeti aktivnosti da predstavnici medija napuste prostor za trening.

ZAPISNIK SA UTAKMICE

Član 38.

Delegat sastavlja zapisnik sa utakmice. Zapisnik sa utakmice se popunjava elektronski, u COMET sistemu. Klubovi su dužni prije početka utakmice dostaviti ovjeren i potpisan spisak igrača i službenika svoje ekipe na propisanom obrascu. Igrači i službena lica prijavljeni na spisku kluba koji se nisu pojavili na utakmici brišu se iz zapisnika, a klub zbog toga snosi disciplinsku odgovornost.

Po završetku utakmice zapisnik sa utakmice sastavljen putem Comet sistema, sravnavaju delegat i sudija, nakon čega delegat zaključuje izvještaj fair playa, a sudija utakmice svojom šifrom zaključuje zapisnik sa odigrane utakmice.

REGISTRACIJA UTAKMICA

Član 39.

Ako na utakmicu nije uložena žalba, a ne postoje uslovi za registraciju po službenoj dužnosti, utakmicu Komitet registruje postignutim rezultatom.

Ako je prvostepena odluka pravosnažna, ili je donijeta drugostepena odluka koja je konačna, jednom registrovana utakmica ne može biti poništena, izuzev u postupku zaštite zakonitosti Pravilnika o nogometnim/fudbalskim takmičenjima NS/FS BiH.

Komiteta vrši analizu i registraciju odigranih utakmica na prvom narednom sastanku, a termin održavanja istog utvrđuju se u skladu sa članom 9. Pravilnika o radu komiteta Izvršnog Odbora i pravnih tijela NS/FS BiH.

Izuzetno, Komitet registraciju odigranih utakmica može izvršiti putem e-maila, telefona ili faksa. Verifikaciju registrovanih utakmica vrši Komitet na prvoj narednoj sjednici.

Ako je na utakmicu uložena žalba, rok za registraciju utakmice se produžava do konačne odluke.

ŽALBE

Član 40.

Žalbe na utakmicu podnose se Komitetu koji ih rješava u prvom stepenu.

Žalbe se po svim osnovama moraju najaviti uz obrazloženje, elektronskim putem, telegramski, e-mailom ili faxom koji ima automatski ispis datuma i vremena o najavi žalbe. Najavu žalbe dostaviti u

NS/FS BiH u roku od 24 (dvadesetčetiri) sata po odigranoj utakmici, a pismeno obrazloženje sa dokazom o uplaćenju taksi mora se dostaviti NS/FS BiH u roku od 48 (četrdesetosam) sati po odigranoj utakmici. Za utakmice posljednja 2 (dva) kola prvenstva, žalbe se najavljuju i dostavljaju u roku od 2 (dva) dana od dana odigravanja utakmice.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi sljedeći radni dan.

Žalba se dostavlja Komitetu putem Službe za takmičenje i suđenje NS/FS BiH.

Uz žalbu se dostavlja dokaz o uplaćenju taksi u skladu sa odlukom IO NS/FS BiH.

Odluke o podnijetim žalbama na utakmice donose se najkasnije u roku od 14 (četrnaest) dana od dana prijema žalbe, odnosno 3 (tri) dana ukoliko se radi o žalbi na utakmicu odigranu u posljednja 2 (dva) kola prvenstva.

TAKSA NA ŽALBU

Član 41.

Visinu takse na žalbu po svim osnovama utvrđuje Izvršni odbor NS/FS BiH.

Taksa se vraća podnosiocu samo ukoliko se žalba u potpunosti usvoji.

Član 42.

Nenajavljene, neblagovremene ili nedovoljno taksirane žalbe neće biti razmatrane, već će biti odbačene, a utakmica registrovana postignutim rezultatom.

Pri ocjeni pravovremenosti žalbe uzima se u obzir datum e-maila, poštanskom žigu preporučenog pisma ili telegrama, datum na faksu potvrdi o žalbi odaslanoj telefaksom ili datum na novčanoj uplatnici.

Član 43.

Žalbe na odluke Komiteta za takmičenje podnose se Apelacionoj komisiji NS/FS BiH u roku od osam (8) dana od prijema pismene odluke.

Za utakmice 2 (dva) posljednja kola rok za podnošenje žalbe je tri (3) dana. Žalba se podnosi putem Komiteta čija se odluka žalbom pobija.

Odluke o podnijetim žalbama na odluke Komiteta donose se najkasnije u roku od osam (8) dana, a o žalbama podnijetim na utakmice posljednja 2 (dva) kola u roku od tri (3) dana od dana prijema žalbe.

Žalbe na odluke Disciplinskog komisije podnose se Apelacionoj komisiji u roku od osam (8) dana od prijema pismene odluke.

Odluke Apelacione komisije su konačne i protiv iste se ne može uložiti žalba.

Član 44.

U interesu regularnosti takmičenja, organ koji donosi odluke može utvrditi i skraćeni žalbeni postupak.

DISCIPLINSKE SANKCIJE

Član 45.

O disciplinskim prekršajima klubova, igrača, članova stručnog i tehničkog rukovodstva i funkcionera klubova i službenih lica na utakmici koji učestvuju u takmičenju, odlučuje se na osnovu Disciplinskog pravilnika NS/FS BiH.

FINANSIJSKE ODREDBE

Član 46.

Prihodi sa prvenstvenih utakmica pripadaju klubu domaćinu.

Član 47.

Službenim licima na utakmici pripadaju odgovarajuće naknade, u skladu sa odlukom Izvršnog odbora NS/FS BiH.

Član 48.

Shodno odluci Izvršnog odbora NS/FS BiH, klubovi su u takmičarskoj sezoni 2026/27 oslobođeni uplate kotizacije za učešće u takmičenju, s tim što su obavezni postupiti u skladu sa Ugovorom između NS/FS BiH i sponzora lige.

NAGRADE

Član 49.

Nogometni/Fudbalski savez BiH prvoplasiranoj ekipi WWIN lige BiH dodjeljuje prelazni pehar i pehar u trajno vlasništvo.

Igračima, tehničkom i stručnom rukovodstvu prvoplasiranog kluba dodjeljuje se 65 (šezdesetpet) zlatnih medalja.

Član 50.

Za osvojeno prvo mjesto u Fair-Play-u klubu pripada pehar koji dodjeljuje Nogometni/Fudbalski savez Bosne i Hercegovine.

ZAVRŠNE ODREDBE

Član 51.

Sastavni dio ovih Propozicija čini i Uputstvo o posjedovanju minimalne medicinske opreme na utakmicama Premijer lige BiH.

Član 52.

Za sve što nije predviđeno ovim Propozicijama, važe odredbe Pravilnika o nogometnim/fudbalskim takmičenjima NS/FS BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 53.

Propozicije stupaju na snagu danom objavljivanja na web stranici Saveza, a primjenjuju se za takmičarsku sezonu 2026/27.

P R E D S J E D N I K

Vico Zeljković s.r.

NOGOMETNI/FUDBALSKI SAVEZ BIH

KOMITET ZA SPORTSKU MEDICINU NS/FS BIH

KLUBOVIMA WWIN LIGE BIH

(Aneks Propozicija takmičenja za takmičarsku sezonu 2025/26.)

MINIMUM MEDICINSKIH ZAHTEJEVA ZA TRETMAN IGRAČA, STRUČNOG ŠTABA TIMA, SUDIJSKOG TIMA I OFICIRA UTAKMICE

Ovaj dokument detaljno specificira minimum medicinskih zahtjeva za takmičenja WWIN lige BiH, u smislu usluga koje treba osigurati klub domaćin za tretman igrača, stručnog štaba tima, sudijskog tima i oficira utakmice. Konkretni zahtjevi za svako takmičenje specificirani su u svakom odjeljku.

1. Medicinska oprema uz teren za igru

Obavezni zahtjevi važe za:

- a) dan igranja utakmice u WWIN ligi BiH

Medicinska oprema uz teren za igru u idealnim uslovima bi trebala biti obezbijedena u medicinskog torbi. Imajte na umu da se ova oprema traži dodatno, pored torbe za hitnu medicinsku pomoć u ambulantnim kolima o kojoj se govori u Poglavlju 2.

Obavezni	Preporučeni
1 x daska za kičmu i oprema za fiksiranje (sa bočnim držačima glave i šipkama (a može značiti i kaiševima)	
Defibrilator (AED) sa mjerenjem ritma i podataka o pacijentu	
Nosila od lesonita	
Stetoskop	
BP monitor sa manžetama dim. 10cm/66cm	
Lampa za pregled zjenica	
Mjerač pulsa	
Mjerač šećera u krvi i/ili mjerni štapići za mjerenje šećera u krvi	
Kardio-lijekovi	
Adrenalin	
Antihistamin	
Hidrokortizon	
Diazepam	
Oprema za infuziju sa kompletima za davanje infuzije i rastvorima	
Prenosivi kisik (minimum 0,5 l)	Larinks-masku
Prenosivi aspirator	Oprema za intubaciju

Resurscitatori s maskama i dišnim putovima (naprava za kratkotrajno i urgentno umjetno disanje)	Komplet za krikotirotomiju s potrošnim sklapelom
Džepna maska	
Maska s ventilom	
Držač razmaka za bronhodilatatore	
Adhezivni materijal za fiksiranje	
Udlage (za fiksiranje udova)	
Komplet cervikalna kragna/kruti vratni podupirač	
Oprema za dezinfekciju	
Jednokratne rukavice	
Čisti zavoj (podveza)	
Lubrikant i lidokain	
Rezač vijaka ili jake makaze	

2. Ambulatna kola

Obavezni zahtjevi važe za:

a) dan igranja utakmice na stadionu odigravanja utakmice WWIN lige BiH

U ostalim takmičenjima izuzev u WWIN ligi BiH klub domaćin je odgovoran za obezbjeđenje ambulantnih kola ALS (za naprednu podršku kod životne ugroženosti) s najmanje jednim članom paramedicinskog osoblja smještenih na pogodnom mjestu kako bi se omogućila hitna medicinska evakuacija s terena bez odlaganja.

Kada su ambulatna kola potrebna na stadionu, savjetuje se ukoliko se ne mogu obezbjediti ambulatna kola javnog zdravstvenog servisa da se koriste privatna ambulantna kola, da bi se osiguralo prisustvo ambulantnih kola na stadionu za potrebitni period (4 sata).

Obavezni	Preporučeni
1 x kompletno opremljena ambulantna kola ALS: - koja bi se koristila samo za tretman igrača, stručnog štaba tima, sudijskog tima i oficire utakmice - koja bi bila prisutna 90 minuta prije početka utakmice, za vrijeme trajanja utakmice i do 30 minuta nakon utakmice (ukupno 2 sata) - lokaciju treba potvrditi ljekarima tima pri dolasku na stadion - da sadrže kompletno opremljenu torbu za hitnu pomoć i AED defibrilator - da se nalaze u području stadiona s kojeg je omogućen najbolji brzi	

izlazak s područja terena/svlačionica za hitnu medicinsku evakuaciju • da imaju najmanje jednog člana paramedicinskog osoblja	
---	--

3. Ljekarsko osoblje

Obavezni zahtjevi važe za:

a) dan igranja utakmice u WWIN ligi BiH

Klub domaćin odgovoran je za obezbjeđenje jednog ljekara obučenog za hitnu medicinsku pomoć koji će biti prisutan uz ivicu terena najmanje od trenutka dolaska timova na stadion i do njihovog odlaska. Tu ulogu može vršiti ljekar domaćeg tima, pod uslovom:

- da je ljekar tima obučen i kvalifikovan za hitnu prvu ljekarsku pomoć i tehnike pružanja pomoći;
- da je imenovan neki drugi dužnosnik iz kluba domaćina za olakšavanje hitne medicinske evakuacije sa stadiona bez odlaganja.

Obavezni	Preporučeni
1 x ljekar za hitnu medicinsku pomoć uz teren za igru: • Vršiti ulogu medicinskog koordinatora za stadion izuzev ako je obezbijeđen i specifični medicinski koordinator. • Odgovoran za osiguranje potrebne medicinske opreme uz ivicu terena specificirane u poglavlju 1. • Odgovoran samo za tretman igrača, stručnog štaba tima, sudijskog tima i oficira utakmice.	
1 x ekipa za nosila (s nosilima od lesonita i najmanje dva obučena nosača (kvalifikacija u pružanju prve pomoći/iskustvo u nošenju pacijenata na nosilima))	

4. Oprema u Sobi za hitnu medicinsku pomoć

Soba za hitnu medicinsku pomoć je obavezni zahtjev za sve utakmice u Premijer ligi BiH. Ta soba mora se nalaziti blizu svlačionica (na istom nivou).

Obavezni	Preporučeni
1 sto za obavljanje pregleda i tretman	Toalet
2 x stolica	
Ogledalo	

Važeća WADA-ina lista zabranjenih supstanci	
Blok za recepte	
Jako svjetlo	
Tekuća voda	
Stetoskop	
Aparat za mjerenje pritiska (sfigmomanometar)	
Materijal/komplet za zašivanje (1 pinceta/1 držač igle/najlonski konac 000 (2 šava)	
Kisik D-veličine (sa stopom protoka najmanje 15 litara/minuta)	
Zamagljivač	
Rukavice (sterilne i nesterilne)	
Šprice	
Igle	
Kutije za oštre predmete	
Tuferi	
Gel za ruke	
Kompleti zavojnog materijala	
Mjerni štapići za brzu analizu krvi i urina	
Zupčani transport (srednji)	
Aluminijski pokrivači	
Oftalmoskop i auroskop	
Mala med.baterijska lampa	
Vrećice s ledom i plastične vrećice	
Alkoholni brisevi	
Bandaže	
Spatule za jezik	
Rezerva lokalnog anestetika (Lidocaine 2% i/ili Ropivacaine)	
Injekcija chlorpheniramina	
Injekcija hidrokortizona	
Injekcija adrenalina 1/10.000	
Epipen/anapen	
Injekcija amiodarona	
Injekcija diazepama, bilo sublingvalnog ili diazemul)	
Iv salbutamol	
Injekcija stemetila	
Glukagon	

KOMITET ZA SPORTSKU MEDICINU NS/FS BiH

Na osnovu člana 21. Pravilnika o radu komiteta Izvršnog odbora i pravnih tijela Nogometnog/Fudbalskog saveza Bosne i Hercegovine, Komitet za sportsku medicinu NS/FS BiH je na sjednici održanoj dana 11.05.2023. godine donio s l j e d e ć u

O D L U K U

o obavezujućim elementima za lječarski pregled igrača

Član 1.

Lječarski pregled igrača mora sadržavati sljedeće minimalne obavezujuće elemente:

- a) Internistički pregled ili pedijatrijski pregled (za igrače do 16 godina), koji obavezno treba sadržavati: EKG analizu u skladu sa UEFA propisima i osnovnu laboratorijsku obradu,
- b) Oftalmološki pregled,
- c) Stomatološki pregled,
- d) Ostale testove i analize prema indikaciji.

Član 2.

Ova Odluka stupa na snagu danom objavljivanja u Službenom glasniku NS/FS BiH.

O b r a z l o ž e n j e

Komiteta za sportsku medicinu NS/FS BiH je na sjednici održanoj 11.05.2023. godine razmatrao odredbu člana 29. Propozicija sa Kalendarom i minimumom Medicinskih zahtjeva takmičenja Premijer liga BiH i završnog dijela Kup-a BiH za takmičarsku 2023/24. sezonu.

Istim članom predviđa se obaveza da svaki igrač, koji nastupa u nekom od prednje navedenih takmičenja, obavezno mora imati u COMET sistemu upisan nalaz o izvršenom lječarskom pregledu koji sadrži ocjenu o zdravstvenoj sposobnosti.

Stav 2. istog člana, predviđa i spisak obavezujućih elemenata a za čije donošenje propisuje nadležnost Komiteta za sportsku medicinu NS/FS BiH.

Shodno prednje navedenom, a kako bi se u potpunosti ispoštovala odredba ovog člana, te precizirala i pojednostavila njegova primjena u praksi, Komitet za sportsku medicinu NS/FS BiH jednoglasno donosi odluku kao u dispozitivu.

KOMITET ZA SPORTSKU MEDICINU NS/FS BiH

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni odbor NS/FS BiH, na sjednici održanoj 26.06.2026. godine d o n o s i

PROPOZICIJE ZAVRŠNOG DIJELA KUPA BiH za takmičarsku sezonu 2026/27

OPĆE/OPŠTE ODREDBE

Član 1.

Ovim Propozicijama utvrđuje se način rukovođenja i organizovanja Nogometnog/Fudbalskog Kupa Bosne i Hercegovine (u daljem tekstu: Kup BiH) u takmičarskoj sezoni 2026/27. U takmičenju za Nogometni/Fudbalski Kup Bosne i Hercegovine mogu da učestvuju svi registrovani nogometni/fudbalski klubovi sa teritorije Nogometnog/Fudbalskog saveza Bosne i Hercegovine (u daljem tekstu: NS/FS BiH).

UKOVOĐENJE I ORGANIZACIJA TAKMIČENJA

Član 2.

Takmičenje za Kup BiH je takmičenje koje se organizuje kao stalno takmičenje NS/FS BiH , a provodi shodno odredbama Pravilnika o takmičenju NS/FS BiH, Pravila igre nogometa/fudbala, i ostalih općih/opštih akata NS/FS BiH, te propisa UEFA i FIFA.

Takmičenje za Kup BiH počinje u općinskim/opštinskim, a nastavlja se u područnim, kantonalnim/županijskim, i entitetskim nogometnim/fudbalskim savezima (u daljem tekstu: teritorijalni i entitetski savezi), te završnim dijelom na nivou NS/FS BiH.

Član 3.

Takmičenjem za Kup BiH u okviru teritorijalnih i entitetskih saveza rukovode nadležni organi tih saveza, a završnim dijelom takmičenja za Nogometni/Fudbalski kup Bosne i Hercegovine rukovodi Komitet za takmičenje NS/FS BiH (u daljem tekstu Komitet), u saradnji sa Službom za takmičenje NS/FS BiH.

Entiteski savezi mogu svojim propisima regulisati pitanja iz ovih Propozicija, koji se odnose na organizaciju i provođenje takmičenja u njihovoj nadležnosti, s tim da ti propisi moraju sadržavati jedinstvene norme iz propisa NS/FS BiH.

UČESNICI TAKMIČENJA ZAVRŠNOG DIJELA KUP-a BiH

Član 4.

U završnom dijelu takmičenja za Nogometni/Fudbalski Kup Bosne i Hercegovine učestvuju 32 (tridesetdva) kluba i to:

- 10 (deset) klubova WWIN Lige BiH iz takmičarske sezone 2026/27,
- 13 (trinaest) klubova iz Nogometnog saveza Federacije BiH i
- 9 (devet) klubova iz Fudbalskog saveza Republike Srpske

U utakmice šesnaestine i osmine finala igraju se po jednostrukom kup sistemu, a četvrtine i polufinala Nogometnog/Fudbalskog Kupa BiH igraju se po dvostrukom kup-sistemu. U finalu se igraju dvije utakmice.

ŽRIJEB PAROVA ZAVRŠNOG DIJELA KUPA BiH

Član 5.

Raspored utakmica završnog dijela Kupa BiH određuje se žrijebom, kojim rukovodi Komitet. Modalitet žrijebanja utvrđuje Komitet za takmičenje.

Kod žrijeba parova šesnaestine finala, ekipa iz nižeg stepena takmičenja je domaćin utakmice, a modalitet ovog žrijeba će utvrditi Komitet. Također, u šesnaestini finala se ne mogu sastati ekipe koje nastupaju u Premijer ligi BiH.

Žrijebanje parova završnog dijela Kupa BiH mogu vršiti predstavnici klubova ili bivši i sadašnji istaknuti nogometaši/fudbaleri, a u tom slučaju Komitet za takmičenje donosi odluku o načinu žrijebanja.

Domaćin prve utakmice finala Kupa BiH se određuje žrijebom.

Klub koji ne bude imao predstavnika na žrijebanju parova će snositi disciplinsku odgovornost.

ORGANIZACIJA UTAKMICA

Član 6.

Organizacija utakmica se vrši prema odredbama Pravilnika o nogometnim/fudbalskim takmičenjima NS/FS BiH i Propozicijama takmičenja Premijer lige BiH.

Utakmice se igraju na terenima registriranim za prvenstvene utakmice klubova učesnika Kupa, a nakon 1/8 finala utakmice se mogu igrati isključivo na terenima licenciranim za odigravanje utakmica WWIN lige BiH.

Izuzetno od prethodnog stava, utakmice se mogu igrati i na terenima koji nisu licencirani za utakmice WWIN lige BiH, ukoliko to procijeni ad hoc komisija NS/FS BiH, a konačnu odluku donosi Komitet za takmičenje.

Organizaciju utakmica šesnaestine finala, osmine finala, četvrtfinala, polufinala i finalnih utakmica vrši klub domaćin.

Nogometni/Fudbalski savez BiH učestvuje u organizaciji finalnih utakmica, a isto se uređuje posebnim protokolom.

Klub domaćin obavezan je neovisnoj snimateljskoj kompaniji, koju ovlasti NS/FS BiH, omogućiti adekvatne uslove za snimanje utakmice s najmanje 3 (tri) kamere, 1 (jednom) na sredini terena i 2 (dvije) bočne u visini kaznenih prostora.

Također, TV kompaniji koja vrši direktni prijenos utakmice, osigurati punu sigurnost za opremu i djelatnike, za vrijeme i nakon završetka utakmice, u objektu stadiona.

Član 7.

Klub domaćin je obavezan na svim utakmicama postaviti na jarbole: državnu zastavu Bosne i Hercegovine, zastavu NS/FS BiH, a mogu se postaviti klupske, entitetske, zastave županija/kantona, te zastava fair playa. Istaknute zastave moraju biti istih dimenzija.

Postavljanje drugih zastava nije dozvoljeno, a u slučaju njihovog postavljanja, klub će snositi disciplinske sankcije po članu 58. Disciplinskog pravilnika NS/FS BiH.

Klub domaćin je obavezan da poduzme sve mjere u cilju osiguranja ličnosti: članova gostujuće ekipe, službenih lica utakmice, gostujućih navijača (kod organiziranog dolaska) za vrijeme odigravanja utakmice, nakon završetka utakmice, sve do napuštanja stadiona i mjesta odigravanja utakmice, kao i poduzeti sve mjere na stadionu za odigravanje utakmice, predviđene Pravilnikom o sigurnosti na međunarodnim utakmicama i utakmicama saveznog stepena takmičenja NS/FS BiH.

Klub domaćin, također je obavezan osigurati odgovarajuću dežurnu redarsku službu s propisno označenim dovoljnim brojem redara zaštitarske organizacije, pripadnika policije, liječnika i dežurno sanitetsko vozilo sa osobljem i nosilima, kao i dovoljan broj skupljača lopti koji moraju biti propisno obilježeni.

Klub domaćin je obavezan nadležnoj policijskoj upravi prijaviti mjesto i vrijeme odigravanja utakmice i pribaviti pismeno odobrenje, a na zahtjev policijske uprave dostaviti i druge relevantne podatke.

Bez pripadnika policije, sanitetskog vozila, ljekara, vatrogasaca i redarske službe utakmica se neće igrati.

Klub-organizator dužan je obezbijediti na stadionu jednu kontrolnu sobu, koja osigurava sveobuhvatan pogled na unutrašnjost stadiona.

Ova kontrolna soba služi za hitno okupljanje: delegata, službenih predstavnika klubova, komesara bezbjednosti kluba domaćina, koordinatora bezbjednosti NS/FS BiH (ako je određen), predstavnika policije u slučaju krizne situacije i po potrebi predstavnika hitne pomoći i vatrogasaca.

PRAVO NASTUPA

Član 8.

Pravo nastupa na utakmicama završnog dijela nogometnog/fudbalskog Kupa BiH imaju igrači koji ispunjavaju uvjete/uslove za nastup, a koji su propisani Pravilnikom o takmičenju, Pravilnikom o registraciji klubova i igrača i statusu i transferu igrača NS/FS BiH i Propozicijama WWIN lige BiH.

UTVRĐIVANJE PLASMANA

Član 9.

U slučaju neriješenog rezultata u utakmicama šesnaestine i osmine finala izvode se udarci sa tačke kaznenog udarca za dobijanje pobjednika na utakmici.

U utakmicama četvrtine, polufinala i finala Kup-a, plasman se ostvaruje na osnovu zbira bodova iz 2 (dvije) utakmice, s tim da pobjeda donosi 3 (tri) boda, a neriješen rezultat 1 (jedan) bod.

Ako je zbir bodova isti, pobjednika odlučuje odnos primljenih i postignutih pogodaka, a ako je odnos pogodaka jednak, nakon druge utakmice izvode se udarci sa tačke kaznenog udarca za dobijanje pobjednika na utakmici, prema Pravilima nogometne/fudbalske igre.

Član 10.

Ukoliko klub, nakon obavljenog žrijeba takmičarskih brojeva, svojom krivicom odustane od Kup takmičenja, ili neopravdano ne dođe na odigravanje utakmice, u dalje takmičenje će se plasirati protivnički klub.

Ukoliko se radi o utakmicama koje se igraju po dvostrukom kup sistemu, a klub neopravdano ne dođe na odigravanje druge utakmice, u dalje takmičenje će se plasirati protivnički klub, bez obzira na rezultat prve utakmice.

Klub koji neopravdano odustane od Kup takmičenja ili neopravdano ne dođe na odigravanje utakmice, snosit će disciplinske posljedice u skladu sa odredbama Disciplinskog pravilnika NS/FS BiH.

ŽALBE

Član 11.

Žalbe na utakmicu podnose se Komitetu koji ih rješava u prvom stepenu.

Žalbe se po svim osnovama moraju najaviti uz obrazloženje, elektronskim putem, telegramski, e-mailom ili faxom koji ima automatski ispis datuma i vremena o najavi žalbe. Najavu žalbe dostaviti u NS/FS BiH u roku od 24 (dvadesetčetiri) sata po odigranoj utakmici, a pismeno obrazloženje sa dokazom o uplaćenju taksi mora se dostaviti NS/FS BiH u roku od 48 (četrdesetosam) sati po odigranoj utakmici. Za finalne utakmice Kup-a, žalbe se najavljuju i dostavljaju u roku od 2 (dva) dana od dana odigravanja utakmice.

Ukoliko rok za ulaganje žalbe ističe u nedjelju ili na državni praznik, rok za ulaganje žalbe se produžava za prvi slijedeći radni dan.

Žalba se dostavlja Komitetu putem Službe za takmičenje i suđenje NS/FS BiH.

Uz žalbu se dostavlja dokaz o uplaćenju taksi u skladu sa odlukom IO NS/FS BiH.

Odluke o podnijetim žalbama na utakmice donose se najkasnije u roku od 14 (četrnaest) dana od dana prijema žalbe, odnosno 3 (tri) dana ukoliko se radi o žalbi na odigrane2 (dvije) finalne utakmice Kupa.

TAKSA NA ŽALBU

Član 12.

Visinu takse na žalbu po svim osnovama utvrđuje Izvršni odbor NS/FS BiH.
Taksa se vraća podnosiocu samo ukoliko se žalba u potpunosti usvoji.

Član 13.

Nenajavljene, neblagovremene ili nedovoljno taksirane žalbe neće biti razmatrane, već će biti odbačene, a utakmica registrovana postignutim rezultatom.

Pri ocjeni pravovremenosti žalbe uzima se u obzir datum e-maila, poštanskom žigu preporučenog pisma ili telegrama, datum na faksu potvrdi o žalbi odaslanom telefaksom ili datum na novčanoj uplatnici.

Član 14.

Žalbe na odluke Komiteta za takmičenje podnose se Apelacionoj komisiji NS/FS BiH u roku od 8 (osam) dana od prijema pismene odluke.

Za utakmice dva posljednja kola rok za podnošenje žalbe je 3 (tri) dana. Žalba se podnosi putem Komiteta čija se odluka žalbom pobija.

Odluke o podnijetim žalbama na odluke Komiteta donose se najkasnije u roku od osam (8) dana, a o žalbama podnijetim na utakmice posljednja dva kola u roku od tri (3) dana od dana prijema žalbe.

Žalbe na odluke Disciplinskog komisije podnose se Apelacionoj komisiji u roku od osam (8) dana od prijema pismene odluke.

Protiv odluke Apelacione komisije ne može se uložiti žalba.

DISCIPLINSKE ODREDBE

Član 15.

O disciplinskim prekršajima klubova, igrača, članova stručnog i tehničkog rukovodstva i funkcionera klubova koji učestvuju u takmičenju, odlučuje se na osnovu Disciplinskog pravilnika NS/FS BiH.

FINANSIJSKE ODREDBE

Član 16.

Troškove organizacije utakmica snosi klub domaćin.

Troškovi organizacije finalnih utakmica regulišu se međusobnim sporazumom NS/FS BiH sa klubovima-učesnicima finala.

Službenim licima na utakmici pripadaju odgovarajuće naknade, u skladu sa odlukom Izvršnog odbora NS/FS BiH.

NAGRADE

Član 17.

Pobjednik Kupa BiH dobija prelazni pehar i pehar u trajno vlasništvo.

Igrači, tehničko i stručno rukovodstvo kluba-pobjednika dobivaju 65 (šezdesetpet) zlatnih medalja, a igrači, tehničko i stručno rukovodstvo kluba finaliste 65 (šezdesetpet) srebrnih medalja.

Zlatne medalje se dodjeljuju službenim licima finalnih utakmica.

Ekipe učesnice utakmica Finala Kupa BiH obavezne su pristupiti uručanju priznanja za osvojeni plasman.

Posebnom Odlukom Izvršnog Odbora NS/FS BiH učesnicima finala se dodjeljuje i novčana naknada.

ZAVRŠNE ODREDBE

Član 18.

Na utakmicama Kupa BiH, i to isključivo utakmicama koje budu realizovane u direktnom TV prenosu, dopuštena je upotreba VAR (Video assistant referee) tehnologije, uz prethodnu ocjenu o opravdanosti upotrebe iste.

Ocjenu o opravdanosti upotrebe VAR (Video assistant referee) tehnologije na utakmicama Kupa BiH, prethodno donosi Komitet za sudije i suđenje, i to najkasnije 5 (pet) dana prije dana zakazanog odigravanja utakmice.

Član 19.

Za sva ostala pitanja koja nisu predviđena ovim Propozicijama važe odredbe Pravilnika o nogometnim/fudbalskim takmičenjima NS/FS BiH, Propozicija takmičenja WWIN lige BiH, Pravila nogometne/fudbalske igre i drugih propisa NS/FS BiH, FIFA-e i UEFA-e.

Član 20.

Propozicije stupaju na snagu danom objavljivanja na web stranici Saveza, a primjenjuju se za takmičarsku sezonu 2026/27.

P R E D S J E D N I K

Vico Zeljković, s.r.

Na osnovu člana 35. Statuta Nogometnog/Fudbalskog saveza Bosne i Hercegovine, Izvršni Odbor NS/FS BiH, na sjednici održanoj dana 26.06.2026. godine, d o n o s i

O D L U K U

***o Kalendaru takmičenja za prvenstvo WWIN Lige BiH, završnice KUPA BiH i SUPERKUPA BiH,
za takmičarsku sezonu 2026/27***

Član 1.

JESENJI DIO

August/ Kolovoz	01.08.2026.	SUPERKUP BiH
	08/09.08.2026.	1. kolo WWIN lige BiH
	15/16.08.2026.	2. kolo WWIN lige BiH
	22/23.08.2026.	3. kolo WWIN lige BiH
	29/30.08.2026.	4. kolo WWIN lige BiH
Septembar/ Rujan	02.09.2026. Srijeda	5. kolo WWIN lige BiH
	05/06.09.2026.	6. kolo WWIN lige BiH
	12/13.09.2026.	7. kolo WWIN lige BiH
	19/20.09.2026.	8. kolo WWIN lige BiH
	21.09. -06.10.2026.	INTERNACIONALNI TERMIN
Oktober/ Listopad	10/11.10.2026.	9. kolo WWIN lige BiH
	17/18.10.2026.	10. kolo WWIN lige BiH
	24/25.10.2026.	11. kolo WWIN lige BiH
	28.10.2026. Srijeda	Utakmice 1/16 finala Kupa BiH
	31.10./01.11.2026.	12. kolo WWIN lige BiH

Novembar/ Studen	07/08.11.2026. 09 - 17.11.2026. 21/22.11.2026. 28/29.11.2026.	13. kolo WWIN lige BiH INTERNACIONALNI TERMIN 14. kolo WWIN lige BiH 15. kolo WWIN lige BiH
Decembar/ Prosinac	02.12.2026. Srijeda 05/06.12.2026. 12/13.12.2026.	16. kolo WWIN lige BiH 17. kolo WWIN lige BiH 18. kolo WWIN lige BiH

PROLJETNI DIO

Januar/ Siječanj	30/31.01.2027.	Utakmice 1/8 finala Kupa BiH
Februar/ Veljača	06/07.02.2027. 13/14.02.2027. 20/21.02.2027. 24.02.2027. Srijeda 27/28.02.2027.	19. kolo WWIN lige BiH 20. kolo WWIN lige BiH 21. kolo WWIN lige BiH Prve utakmice 1/4 finala Kupa BiH 22. kolo WWIN lige BiH
Mart/ Ožujak	03.03.2027. Srijeda 06/07.03.2027. 13/14.03.2027. 17.03.2027. Srijeda 20/21.03.2027. 22 - 30.03.2027.	23. kolo WWIN lige BiH 24. kolo WWIN lige BiH 25. kolo WWIN lige BiH Revanš utakmice 1/4 finala Kupa BiH 26. kolo WWIN lige BiH INTERNACIONALNI TERM

Aprill/ Travanj	03/04.04.2027.	27. kolo WWIN lige BiH
	07.04.2027. Srijeda	Prve utakmice 1/2 finala Kupa BiH
	10/11.04.2027.	28. kolo WWIN lige BiH
	17/18.04.2027.	29. kolo WWIN lige BiH
	21.04.2027. Srijeda	Revanš utakmice 1/2 finala Kupa BiH
	24/25.04.2027.	30. kolo WWIN lige BiH
Maj/ Svibanj	01.05.2027.	31. kolo WWIN lige BiH
	05.05.2027. Srijeda	Prva utakmica finala Kupa BiH
	08/09.05.2027.	32. kolo WWIN lige BiH
	12.05.2027. Srijeda	Revanš utakmica finala Kupa BiH
	15.05.2027.	33. kolo WWIN lige BiH
	19.05.2027. Srijeda	34. kolo WWIN lige BiH
	23.05.2027.	35. kolo WWIN lige BiH
	30.05.2027.	36. kolo WWIN lige BiH